

Canones ejus sunt:

1 *Veritas affirmati axiomatis est fundamentum veritatis negati.*

Alii sic enunciant: *Veritas axiomatis negati concludi non potest, nisi ex veritate alicuius affirmati.* Item: *Vera negatio pendet à verâ affirmatione.* Non enim rectè dicerentur bona opera non justificare, nisi verum esset, solam fidem justificare. Videris Fonsecam de illo canone 4. *Metaph. ad cont. 15.*

2 *Negatio vehementius negat, quam affirmatio affimmat.*

Alii sic enunciant: *Firmior est veritas negationum, quam affirmationum.* Hoc non est accipiendum de firmitate entitatis, sed asseverationis seu prædicationis.

3 *Axioma negatū est, cùm particula negandi vel toti axiomati præmittitur, vel copulae immediate additur.*

Ut, Nulli electi damnantur; conjugium non est sacramētum. Non igitur est axioma negans: Populus qui non est intelligens, cōturbabitur, *Hos. 4. v. 14.* quia negatio inserta est descriptioni partis antecedentis. Nec hoc: Cæcum est quod non habet visum; quia definitio affirmatur de definito. Nec hoc: Substantia non producitur nisi à substantiâ; quia particula *non* per tmesin hîc ponitur, ita ut hic sit sensus, substantia non nisi (hoc est, tantùm) à substantiâ producitur. Sic hoc axioma; primus homo potuit non peccare, est affirmans & verum; sed hoc, primus homo non potuit peccare, est negans & falsum. Uno verbo: Axioma negatum censetur, cuius vinculum negatur. Nam quando dico, Nullus homo est lapis, *τὸ* nullus est vocula syncategorematica, quę preponitur quidem toti propositioni, sed tamen convenit vinculo, ut res ipsa loquitur.

4 *Negationis fundamentum est rerum dissenſio.*

Itaq; argumenta dissentanea negando sunt disponenda. Fit igitur axioma negatū 1. Ex diversis: Ut, Judas fuit Apostolus, & non fuit salvatus. 2. Ex contradicentibus: ut, videns non est non-videns. 3. Ex relatè oppositis: ut, pater non est filius. 4. Ex privantib. ut, vita non est mors. 5. Ex cōtrariis: ut, virtus non est vitiū. Hîc aliquis non ab re roget, quid ergò sit